

LE BULÚ'INĚ' DIOS JUAN

Apocalipsis

Le bulu'e lahui Dios ca naca queë' Jesucristo

1 ¹ Lë ni naca le bulu'e lahui Jesucristo, le bë'ë Lë' lataj Dios uluí'inë' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' buluí'inë' neda' ca naca lë ni. ² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zé nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacuá' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxë'ë queéli', en gunë' ga cö'ö dxi icja ládx'i'do'oli', ate' dzágagaca gadxi bö' Lë' nacuá' lahuë' Lë' ga ni' rölë rinná bë'ë. ⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'inë' rë'u, en gudibë' rë'u, tu' bugüë' dul-la' nabága'ru' len xichönë' le bulaljë' lë'e yaga cruz, cate' gútië' uláz queëru'. ⁶ Jesucristo benë' ga rinná bé'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. iYöl-la' ba Lë', en gácatica'sö queë' yöl-la' unná bë' iCa' gaca!

⁷ iBuli'yútsöca!! iZë'ë Cristo lu böaj lúzxiba! ila'lé'e Lë' yúgu'të bönachi, enca' nupa ni' gulún Lë' huë', en bétigaca Lë'! ila'bödx'i yechi' yúgu'të bönachi yödzölió ni cate' ila'lé'e Lë'! iLa'tu' gácatë caní! iCa' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. iZoa cazë' Lë', en guzóatica'së', en si' ulé'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxón riguí'i rizáca'lena' libí'ili', en tsözxón len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' rnnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos.

Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. ¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyón chi'ë ca ribödxí lúzuba' böa' bëdxi. ¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' bönachi quia' nacuá' luyú Asia, nupa nacuá':

Lu yödzö Éfeso,
lu yödzö Esmirna,
lu yödzö Pérgamo,
lu yödzö Tiatira,
lu yödzö Sardis,
lu yödzö Filadelfia,
lu yödzö Laodicea."

¹² Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro. ¹³ Ladaj gadxi le nuá'gaca guí' na' bilé'eda' tu Bönni' riné'ë ca tu bönni'. Nacuë' tu lari' tunna le ridxín xini'ë, en luchu'ë nasíë' tu le néquini oro.

¹⁴ Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiój lahuë' ca guí'. ¹⁵ Rëpi yösa bení' ni'ë ca guíë bronce dxíldo', le nudzé'eda' lu guí' ca bo' yalaj. Zidzaj biyón chi'ë ca riyón tu yegu zxön. ¹⁶ Lu në'ë ibëla zxóagacaba' gadxi böljaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. ¹⁸ Naca' Nu nabán caz. Gútia', ate' na'a zóatíca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. ¹⁹ Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. ²⁰ Lë ni naca le nagachi' ca naca quégacaba' gadxi böljaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

Didza' gusól-lë'ë yödzö Éfeso

2 ¹ Gunné' ca' Bönni' na': "Buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi böljaj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquiguequini oro. ² Caní rnní'a: Neda' nöz quézida' yugu' le runli', en ca rúnda'ali' dxin. Nözda' ribózáli' zxön ladxi', en biti' gaca guá' ilenli' nupa tua' dö'. Nözda' chiguzxí' bé'ëli' nupa ta'nná nácagaca gubáz quia' pero biti' ca'

nácagaca, ate' na'a nózili' ta'zí' yé'. ³ Ribózáli' zxön ladxi', en chigudí'i guzxáca'li' tu' dá'ali' neda', pero biti' gucuidi' ládxi'li'. ⁴ Na'a, dē tu le ruzegui libí'ili' didza': Bítirō nadxí'ili' neda' ca na' bidxí'ili' neda' zí'alö. ⁵ Que lē ni na', guli'tsöjné ca na' benli' zí'alö, lē na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queé'li', ate' ugúa' le nuá' guí' queé'li' xilataj. ⁶ Na'a, zoa tu le rácalen libí'ili'. Biti' rilé'eli' dxi'a le tunē' bönni' nicolaíta, nupa na' ta'yéaj ládxi'gaca budó' guió'j budó' yaga, en tun le ruá' dö', lē na' lēasca' biti' rilé'eda' dxi'a. ⁷ Nu riyöni ral-la' uzé' nagui lē ni rnnē' Dios Bö' Lá'ayi, ruí'ilenē' yugu' cō' bönachi quia' neda', Cristo, didza', rnnē': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queē' Dios, le gun ga ila'cuá'tica'sö nabán."

Didza' gusól-lē'ē yödzö Esmirna

⁸ Gunné' ca': "Lēasca' caní, buzúaj lu guichi didza' ni isól-lu'u queē' gubáz quia' zóalenē' bönachi quia' lu yödzö Esmirna. Caní uzúaju' lu guichi: Ru'ē didza' Bönni' na' zoē' zí'alö, en náquiē' ca' Nu rōjsete, Bönni' na' gútiē', en bubanē' tsaz. ⁹ Caní rnnía': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácate rilé'eli' yöl-la' tsahui' le naca idú. Nözda' ca' ca ta'nné queé'li' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. ¹⁰ Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi guíē. Caní si' bē' libí'ili', ate' quí'i sáca'li' idú ca chi dza. Guli'tséajlē' neda' ga idxintē dza gátili', ate' neda' gunna' yöl-la' na'bán idú queé'li'. ¹¹ Nu riyöni ral-la' uzé' nagui lē ni rnnē' Dios Bö' Lá'ayi, ruí'ilenē' didza' yugu' cō' bönachi quia' neda', Cristo, rnnē': Nupa ila'deli' lu le raca yödzölió, biti' bi gun yöl-la' guti quéguequi, lē na' gaca le buropi luzuí quégaca nupa ila'cuá'tica'sö lu guí' gabila."

Didza' gusól-lē'ē yödzö Pérgamo

¹² Gunné' ca': "Lēasca' caní buzúaj lu guichi didza' ni isól-lu'u queē' gubáz quia' zóalenē' bönachi quia' lu yödzö Pérgamo. Caní uzúaju' lu guichi: Ru'ē didza' Bönni' na' nu'ē guíē tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bē' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlē'eli' neda'. Biti' busanli' le yugu' dza ni' cate' gulútiē' Antipas, bönni' ni' béntica'sē' ba nalí quia', en gútiē' ga ni' zoa Satanás, tu' xihui'. ¹⁴ Na'a, dē tu chopa le tu'zegui libí'ili' didza': Nacuá'len libí'ili' bal-la bönachi lu yödzö Pérgamo, nazí' lu né'eguequi xibá queē' Balaam, bönni' ni' busédinē' Balac benē' ga gula'chixi gula'nigui bönachi Israel, ate' gulahuē'-ba' yugu' böa' bédxido' gulútigaquiē'-ba' lógaca budó' guió'j budó' yaga, en gulunē' le ruá' dö'. ¹⁵ Lēasca' caní nacué'len libí'ili' nupa

ni' nazí' lu né'eguequi xibá quégaca bönachi nicolaíta, lë na' biti' rilé'eda' neda' dxi'a. ¹⁶ Que lë ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guíë tuchi'. ¹⁷ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guió'j chiguí'chido' quégaquië', ate' lu guió'j na' nazúaj tu la cubi, cuntú nu nunbë' le, pero núpasö na' ila'zí'i le, ilúnbë'e la na'."

Didza' gusól-lë'ë yödzö Tiatira

¹⁸ Gunnë' ca': "Lësca' caní, buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guió'j lahuë' nácagaca ca guí', ate' ni'ë nácagaca ca guíë bronze dxí'lido'. ¹⁹ Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ladxí' queëli'. Nözda' nácáro idú ca runli' yugu' lë ni ca benli' zí'alö. ²⁰ Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guió'j budó' yaga. ²¹ Neda' bë'a-nu lataj ubí'i ládxi'nu, pero biti' ré'ëninu ucá'ananu le ruá' dö' na' runnu. ²² Que lë ni na' chú'una'-nu tu le gáti'nu ga na' quí'i sáca'nu lu xihuë'ënu tsözxón len nupa gulún tsözxón len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'. ²³ Guna' ga ilátibi' zxí'ininu. Caní gaca, iléqui'be'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queëli' tsca naca le runli'. ²⁴ Ia'zíca'li' zóali' yödzö Tiatira, núlöli' biti' nazí' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. ²⁵ Na'a, lë na' chinazí' lu ná'ali', guli'gún chi'i ga idxintë dza huöda'. ²⁶ Bönni' ni' ila'déli'në' lu le raca yödzölió, en ilunë' ca ré'ënda' neda' ga údxitë, neda' guna' ga ila'nná bé'enë' bönachi idútë yödzölió. ²⁷ Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guíë, ate' ulu'zxuzxjë' bönachi na' ca nu ruzxuzxaj zxiga' yó'öna néquini yu. ²⁸ Gu'a ca' le naca ca böla'j hui sila quégaquië'. ²⁹ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusól-lë'ë yödzo Sardis

3 ¹ Gunné' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi böläj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. ² Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. ³ Guli'tsöjné na'a xibá na' biyónili' le guzxí' lu ná'ali'. Guli'gún ca rnna xtídze'ë Dios, en buli'bí'li ládxi'li'. Channö cabí usubán ládxi'li', guída' ga zóali' tsálido'os ca na' ridxinë' tsálido'os gubán, en biti' inózili' bizxi dza na' guída' ga zóali'. ⁴ Nacuá'len bal-la bönachi libí'ili' lu yödzo Sardis, nupa biti' nácagaca xihui'. Ila'dalen nupa ni neda', nácugaca lari' chiguíchido'os le ruluí'i nuhuóacagaca idú tsahui', en nácagaca lesaca' gaca caní quéguequi. ⁵ Nupa ila'deli' lu le raca yödzölió ugácuá' léguequi lari' chiguíchido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'. ⁶ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusól-lë'ë yödzo Filadelfia

⁷ Gunné' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë zxí'ini guíë queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. ⁸ Bönni' ni rnnë': Neda' nöz quézida' le runli'. Nözda' nápalí' lático'os yöl-la' huáca, pero runli' ca rnna xtídza'a, en biti' rutuí'ili' rnnali' néquili' quia'. Que lë ni na' nuzóá' loli' tu ga nu tsaz le nayalaj, ate' cuntu nu gaca usayaj le. ⁹ Buli'yútsöca', ta'dé' bönni' ni' Satanás, tu' xihui', en ta'zí' yë'ë, ta'nné' nácagaquië' bönachi judío ta'yéaj ládxi'gaca Dios, pero biti' nácagaquië' caní, guna' ga ila'dxinë' loli', en ulu'zechu zxíbigaquië' xiní'ali'. Ní'irö iléquibe'enë' nadxí'ida' libí'ili'. ¹⁰ Tu' benli' ca rnna xtídza'a, en gulózali' zxön ladxi', gun chi'a libí'ili' dza na' ila'guí'i ila'zaca' yúgu'të bönachi lu yödzölió ni, lë na' gaca para si' bë' léguequi. ¹¹ iSi' guída'! Que lë ni na' guli'gún chi'i le nápalí', para cabí gaca nu gun ga cabí sí'ili' lë na' ral-la' gunna' queé'li'. ¹² Núlöli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxón, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzo queë' Dios le naca Jerusalén cubi, le huötaj irúaj yehua' yubá lu në'ë Dios.

Lësca' udá'a libí'ili' La' cubi. ¹³ Nu riyöni ral-la' uzé nagui læ ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusól-lë'ë yödzö Laodicea

¹⁴ Gunnë' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzö Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca' rnnë', en ru'ë didza' idútë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios. ¹⁵ Caní rnnë': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxi'li'. Dxí'arö gaca la' gácali' ca nisa ziaga o ca nisa zögui'. ¹⁶ Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuëbi nisa nati yula na'. ¹⁷ Libí'ili' rnnali' rilé'eli' yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. iBayechi' nácali'! iNácali' xizí'! iNácali' yechi', en lo chul-la, en ridali' xiguídisö! ¹⁸ Que læ ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutuí'i. Ral-la' gá'uli' ca' quia' le gun ga ulu'huöáca guió'j loli' para gaca ilé'eli' le naca quia'. ¹⁹ Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que læ ni na', buli'bí'i ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö nútí'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idéli'li' lu le raca yödzölió, neda' guna' ga có'öli' tsözxón len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxón ga na' rö'ë rinná bë'ë. ²² Nu riyöni, ral-la' uzé nagui læ ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo."

Yöl-la' ba ta'gu'ë Dios yehua' yubá

4 ¹ Gudödi gulaca yugu' læ ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxí lúzuba' böa' bédxi. Chi'i ni bulidza neda', gunná: "Gudá xitsá'alö ni, ate' neda' uluí'ida' li' le run bayudxi ilaca tödi ni."

² La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'.

³ Rëpi yösa bení' Nu na' rö'ö lataj na', ca na' rëpi yösa bení' guió'j jaspe, en guió'j cornalina, yugu' guió'j nazáca'da'. Idú gásibi'ilö lataj na' zoa biguita' le naca lachi ca naca guió'j esmeralda, le répida' yösa bení'. ⁴ Idú

gásibi'ilö lataj na' nacuá' ca' ia'tapa uruá' lataj gapa ta'bó' nupa ta'nná bē', ate' yugu' lataj na' rō'ōgaquiē' tapa uru'ē bōnni' gula, nácugaquiē' lari' chiguíchido'os, en dxíagaca ícjagaquiē' le néquiguequini oro.

⁵ Ta'rúaj yōsa, en guziú' rinné lu lataj lo ga ni' rō'ō Nu na', ate' bō zxön ru'u. Lahui' lo lataj na' tu'zení' gadxi le ta'gú'u bení', le nácagaca gadxi bō' dzágagaca Dios. ⁶ Ca dódilö lahui lataj ni dē tu ca naca tu nísado' le rēpi yōsa bení' ca guió'j jara.

Nacuá' tapa nupa nabángaca cuiti lataj na', tsölá'a huéaj, ate' zían guió'j lógaca dxíagaca zaca' cúdzi'löguequi, en láhuilöguequi. ⁷ Tu nu nutsa' ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunni nalá' lahui ca naca lo bōnni', ate' nu budapi nalá' ca nácaba' bisiá' ruzuba'. ⁸ Idápatē nupa ni, nacuá' xopa xíligaca que queēguequi, ate' idá'alöguequi, en lé'elöguequi xíliguequi dxíada'gaca zían guió'j löguequi. Rēla, en te ža biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulé'!

⁹ Nupa na' nabángaca ta'gú'u yöl-la' ba Nu na' rō'ō rinná bē', en zóatica'sö nabán. Tun bal Nu na', en tē Nu na': "Xclenu'." Bátati'tēs tun idapa na' caní, ¹⁰ tu'tsaga lógaca tapa uru'ē bōnni' gula na' lu yu lahui' lo Nu na', en ta'yéaj lādxi'gaca Nu na' zóatica'sö, en tu'cu'ē le néquiguequini oro dxía ícjagaquiē' lahui' lo lataj ga ni' rō'ō rinná bē' Nu na', ta'nné':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bē' tu' benu' yúgu'tē le dē!

¡Ca ré'ēni quézinu' nacuá', en gula'sí lo nacuá'!

Tu guichi, en Bōnni' náquiē' Bö'cu' Zxíla'do'

5 ¹ Ní'irö bilé'eda' tu guichi lu na' ibēla Nu na' rō'ō lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le. ² Bilé'eda'-nē' tuē' gubáz lá'ayi lo, ate' bē'ē zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calēga nu zoa yehua' yubá, en calēga nu zoa luyú, en calēga nu zoa zxánilö luyú.

⁴ Ní'irö gurōdxa' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le.

⁵ Ní'irö tuē' bōnni' gula ni' gudxē' neda', gunné': "Biti' cōdxu'. Bōnni' na' náquiē' ca bēdxi guixi', en nabábalenē' zxí'ini xi'sóē' Judá, en náquiē' ca' zxí'ini xi'sóē' David, chibidéli'nē' lu yúgu'tē le raca, en séqui'nē' uládu'ē le naguéla'gaca guichi ni, en usálajē' le."

⁶ Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxila' zoa nu bëti lëba' lahuë' Dios, nacuá' gadxi lúzuba', en gadxi guió'j loba', le tu'luí'i ca nácagaca gadxi bö' na' dzágagaca Dios, nasól-lë'ë léguequi idútë yödzölió. ⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. ⁸ Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaqüië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' ruluí'i yöl-la' rulidza Dios quégaca bönachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',
 en uládzu'u le naguéla'gaca le,
 tu' bë'u lataj yugu' bönni' gulútië' Li',
 ate' len xichönu' böá'uu' bönachi para ilequi queë' Dios,
 nupa nácagaca bönachi izá'a nacuá' idútë yödzölió,
 bönachi tuí'i yúgu'të didza' yúbölö,
 en nabábagaca yúgu'të yödzö,
 en yúgu'të luyú nacuá' idútë yödzölió.

¹⁰ Benu' ga nácagaquië' bönni' ta'nná bë'ë
 en ga nácagaquië' bixúz queë' Dios queëru'.
 Benu' ga ta'nná bë'ë lu yu yödzölió.

¹¹ Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxön len nupa na' nabángaca, enca' yugu' bönni' gula na'. ¹² Tu'ë zidzaj didza' yúgu'të', ta'nné':

iBönni' na' náquië' Bö'cu' Zxíla'do' gulútië',
 náquië' lesaca' gata' yöl-la' unná bë' lu në'ë,
 en yöl-la' tsahui', en yöl-la' réajni'i, en yöl-la' huáca!
 iNáquië' lesaca' gunru'-në' bal, en tseaj ládxi'ru' Lë',
 en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacuá' yugu' lataj na', ta'nná:

iYöl-la' ba Nu na' rö'ö lataj lo,
 enca' Bönni' na' náquië' Bö'cu' Zxíla'do'!
 iGúntica'siru'-në' bal
 en cú'utica'siru'-në' yöl-la' ba,
 ate' inná bé'tica'së' Lë'!

¹⁴ Idápatë nupa na' nabángaca ta'nná: “iCa' gaca!”

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

Yugu' le naguéla'gaca guichi

6 ¹ Ní'irö bilé'eda'-në' Bönni' náquië' Bö'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chi'i ca guziú' rinné, gunná: “iGudá uyú!”

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatërö lo para idéli'në' lu gudil-la.

³ Cate' buládzu'ë le buropi le naguela' guichi na', biyönda' nu buropi na' nabán, ate' gunná: “iGudá uyú!”

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzjë' queë' tu guíë tuchi' zxön.

⁵ Cate' buládzu'ë le bunni le naguela' guichi na', biyönda' nu bunni na' nabán, ate' gunná: “iGudá uyú!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxicóns. ⁶ Biyönda' ruí'i didza' tu chi'i gatsaj láhui'lö tapa na' nabángaca, ate' gunná: “Chopa guíë zxoa' xtila len lazxaj que tu dza huen dxin tu' gaca gubín, en xopa guíë zxoa' cebada len lazxaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la.”

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: “iGudá uyú!”

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guíë tuchi', en len yöl-la' ridún, en len yugu' yödzöhué', en len yugu' böa' guixi' sínia' dzó'öba' luyú.

⁹ Cate' buládzu'ë le guyu' le naguela' guichi na', bilé'eda' zcan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. ¹⁰ Guluí'i zidzaj didza' yugu' bö' ni, gula'nná: “iXantu' Lá'ayi, runu' ca rnno'! ¿Bátaxi caz uchi'a usöróu' queétu', en uzí'i lëbu' yugu' bönni' nacu'ë yödzölió tu' gulútië' netu'?”

¹¹ Bulu'nödzjë' quéguequi yugu' lari' chiguíchido'os ilácuë', en gulé' léguequi: “Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bétigaca libí'ili’.”

¹² Cate' buládzu'ë le buzropi le naguela' guichi na', buyúa', en bilé'eda' gudódida' budó' zxu' luyú. Böáca gasaj gubidza, en guca ca tu Zapoteco del Rincón. ©La Liga Bíblica 1992

lari' guitsa' gasaj, ate' böáca beo' xiná ca naca rön. ¹³ Gula'guínnaj böläj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. ¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. ¹⁵ Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bé'enë' bönni' röjáquië' gudil-la, en yugu' bönni' dë lu ná'agaquië', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquië' gapa naca zcan bulóaj, en gapa naca lë'e guió'j lu guí'ado'. ¹⁶ Gulé' yugu' guí'ado' na', en yugu' lë'e guió'j na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. ¹⁷ Chibidxín dza uluí'i lahui yöl-la' rilé quégaquië', ate' ¿nuzxi caz sequi' guá' ilén le?"

Tu gayuá' yu' tapa-un milë' bönni'

7 ¹ Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'záguë'ë xinó'zgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'túë' gubáz lá'ayi zë'ë rirúajë' ga rilén gubidza. Nu'ë tu le udé'ë nupa nácagaca queë' Dios ban le gaca bë' lëguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. ³ Gudxë' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

⁴ Biyönda' tsca nácagaquië' bönni' da' légaquië' lë na' naca bë'. Nácagaquië' idú tu gayuá' yu' tapa-un milë' ladaj yúgu'të cö' xzí'ini xi'söë' Israel. ⁵ Yugu' bönni' na' da' légaquië' lë na' naca bë' nácagaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

⁶ Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

⁷ Chinnu milë' di'a dza queë' Leví.

Chinnu milë' di'a dza queë' Isacar.

⁸ Chinnu milë' di'a dza queë' Zabulón.

Chinnu milë' di'a dza queë' José.

Chinnu milë' di'a dza queë' Benjamín.

Bönachi guizxi yu nácugaca lari' chiguíchido'os

⁹ Gudödi guca lë ni buyúa', en bilé'egacada' bönachi zián, cuntu nu gaca ulaba léguequi. Nabábagaquië' yúgu'të yödzö tuí'i didza' yúbölö idútë yödzölió. Zuíguequinë' ca dódilö lahui lataj lo, ga na' rō'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zóngaqüë' zin. ¹⁰ Tu'ë zidzaj didza' yúgu'të', ta'nné':

iYöl-la' rusölá za' lu në'ë Dios queéru', rō'ë lataj lo ni,
en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dódilö lahui lataj lo na', en ta'yéaj ládxi'gaquië' Dios, ¹² ta'nné':

iCa' gaca! iYöl-la' ba Li', Dios queétu'!
iNapu' yöl-la' zxön, en yöl-la' réajni'!
iRëtu' Li': "Xclenu'", en runtu' Li' bal!
iNapu' yöl-la' unná bë', en yöl-la' huáca!
iGácatica'sö caní quiu', Dios queétu'!
iCa' gaca!

¹³ Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquië'?"

¹⁴ Neda' gudxa' lë: "Xan, li' nöz quézinu'."

Lë' gudxë' neda': "Nupa ni gula'guí'i gula'záca'da'. Gula'guí'bë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'. ¹⁵ Que lë ni na' nacu'ë ca dódilö lahui lataj lo ga rō'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rō'ö lataj lo ni gun chí'i légaquië' tu' zóaléntica'sö légaquië'. ¹⁶ Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá ¹⁷ tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxila'. Zoë' gatsaj láhui'lö lataj lo na'. Iché'ë légaquië' gapa ralaj nisa le ruí'i yöl-la' na'bán, ate' Dios uzxië' lógaquië' nisa ta'bödxë'."

Le igadxi le naguela' guichi

8 ¹ Cate' buládzulë le igadxi le naguela' guichi na', guró'ö dxi yehua' yubá idú gatsaj hora. ² Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. ³ Ní'irö bidë' ia'túë' gubáz lá'ayi, nu'ë tu zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate'

bidxín ga na' rō'ē Dios. ⁵ Ní'irō gubáz lá'ayi na' bulíē' xzíga'do' na' len bo' yalaj dxía lu bucugu na', ate' gurú'unē' le luyú. Gunnē guziú', ate' bö zidzaj biyón. Guyēpi yōsa, en gudōdi budó' xzu'.

Tu'cödxē' lúzuba' böa' bēdxi

⁶ Ní'irō igádxitē' gubáz lá'ayi na' zóngaqüē' gadxi lúzuba' böa' bēdxi na' gula'cu'ē sina' ulu'cödxē' léguequi.

⁷ Bucödxē' gubáz lá'ayi zí'alō lúzuba' böa' bēdxi, ate' guró'ō guíój bögui' yōla sunna, en guí' nutsí'i rōn, ate' bulu'huōxaj luyú. Guyegui tu cō' tsa tu tsonna cō' le dē luyú ni, ate' guyegui ca' tu cō' tsa tu tsonna cō' yaga. Guyegui ca' yúgu'tē guixi' ya'a.

⁸ Bucödxē' gubáz lá'ayi buropi na' lúzuba' böa' bēdxi, ate' gubixi tu le naca ca tu guí'a xzōn régui lu nísado', ate' ia'láti'do'os ca gatsaj tu gatsaj nísado' na' böáca rōn. ⁹ Guti tu cō' tsa tu tsonna cō' le nabángaca dzō'ō lu nisa xzōn na', ate' guca ditaj tu cō' tsa tu tsonna cō' le ta'dōdi láhui'lō nisa na'.

¹⁰ Bucödxē' gubáz lá'ayi bunni lúzuba' böa' bēdxi, ate' böxaj tu bölj lúzxiba, le régui ca tu guí' yōri gapa dē nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rō'ō luyú.

¹¹ Bölj ni lēba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dē nisa, en guca ca naca le silá' na', ate' gulati bōnachi zían ni'a que nisa na' böáca silá'.

¹² Bucödxē' gubáz lá'ayi budapi lúzuba' böa' bēdxi, ate' böáca chul-la ia'láti'do'os ca gatsaj tu gatsaj gubidza, en lēasca' caní guca que beo', ate' böáca chul-la tu cō' tsa tu tsonna cō' bölj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zení' bölj, en beo' ia'láti'do'os ca gatsaj tu gatsaj rēla.

¹³ Ní'irō buyúa', en biyōnda' ru'ē zidzaj didza' tuē' gubáz lá'ayi ridōdē' gatsaj láhui'lō lúzxiba, en rnnē': “iBica' bayechi' libí'ili'! iBica' bayechi' libí'ili'! iBica' bayechi' libí'ili' zóali' luyú ni cate' ulu'cödxē' ia'tsonnē' gubáz lá'ayi na' lúzuba' böa' bēdxi!”

9 ¹ Bucödxē' gubáz lá'ayi guyu' lúzuba' böa' bēdxi, ate' bilé'eda' nu naca ca tu bölj lúzxiba böxaj luyú, ate' bulu'nödzjē' nu na' xzí'ini guíē que lataj chul-la. ² Gusaljē' lataj chul-la na', ate' gurén dzōn que lataj chul-la, le guca ca dzōn rirúaj ga tu'zégui'ē bulá'do', ate' gula'chul-la gubidza, en lúzxiba ni'a que dzōn na'. ³ Lu dzōn na' bila'rúajba' bóchi'zu, yugu' le gula'zxóasiba' luyú, ate' Dios bē'ē légacaba' lataj iládu'ba' bōnachi ca tunba' xōjnó' dzó'ōba' luyú. ⁴ Gunná bé'enē' légacaba' biti' ilún díjtjaba' guixi' rō'ō luyú, en biti' ilún díjtjaba' yugu' le naca ya'a, en calēga yugu' yaga, pero gácasō iládu'ba' bōnachi na' biti' da' lē na' naca bē' nu nequi queē' Dios ra' xigágaquiē'. ⁵ Biti' bē'ē légacaba' lataj ilútiba' légaquiē', pero ulu'saca' zí'isiba' légaquiē' idú ca gayu' beo'. Riláda' ga tádu'ba' ca na' rilá ga rádu'ba' xōjnó'. ⁶ Yugu' dza

na' ilé'ënē' yugu' bönni' iluti cúngaquiē', pero biti' ila'zéqui'nē'.
Ilé'ëninē' ilátiē', pero ucuíta cuini yöl-la' guti.

⁷ Nalá'gacaba' bóchi'zu na' ca nácagacaba' böa' nácugacaba' le néquiguequini guíē, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi.

⁸ Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bēdxi guixi'. ⁹ Nácugaca luchú'ugacaba' le néquini guíē. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. ¹⁰ Nácagaca xibángacaba' ca naca xibángacaba' xöjnó', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. ¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

¹³ Bucödxē' gubáz lá'ayi buzxopi lúzuba' böa' bēdxi, ate' biyönda' tu chi'i ruí'i didza' gatsaj láhui'lö tapa le nácagaca ca lúzuba' bēdxi dá'gaca tapa squin bucugu na' néquini oro, le rö' lahuē' Dios. ¹⁴ Chi'i ni ruí'ilen didza' gubáz lá'ayi buzxopi na' si' bucödxē' lúzuba' böa' bēdxi, en rnna: “Busedxi idápatē' gubáz xihui' na' nága'gaca ra' yegu Eufrates.”

¹⁵ Ní'irö bulu'sedxē' tapa gubáz xihui' na', chinucözē' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacuá' yödzölió. ¹⁶ Biyönda' tsca nácagaquiē' bönni' röjáquiē' gudil-la dxíagaquiē'-ba' böa', en dzágagaquiē' tapa gubáz xihui' na'. Nácagaquiē' idú chopa gayuá' mil milē'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bēdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre.

¹⁸ Yugu' lē na' ta'rúaj ruá'agacaba' bétigaca tu cö' tsa tu tsonna cö' bönachi nacuá' luyú, lē na' nácagaca guí', en dzön, en lē na' ruzégui'da'.

¹⁹ Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

²⁰ Ia'zíca'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guió' budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

Gubáz lá'ayi, nuá' lu në'ë tu guíchido'

10 ¹ Ní'irö bilé'eda'-në' ia'túë' gubáz lá'ayi nál-la, bö'tjè' birúajè' yehua' yubá, nácuë' bö'aj lúzxiba, en zoa ca tu biguita' ícjälè'. Rëpi yösa bení' lahuë' ca run gubidza, ate' nácgaca ni'ë ca ya'zxón ta'yegui. ² Zoa lu në'ë tu guíchido' nayalaj, ate' tu ni'ë ibëla nulibè' lu nísado', en ia'tú ni'ë yógöla nulibè' luyú bidxi. ³ Ní'irö bë'ë zidzaj didza', ate' biyón chi'ë ca riyón cate' ribódxí'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza' yehua' yubá, rë neda': "Bucáchi'sö didza' ni guluí'i gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-në' zuínè' lu nísado', en luyú bidxi, guchisa në'ë ibëla zaca' lúxibälö, ⁶ ate' ben tsutsu xtídzè'ë ni'a que Nu na' zoa caz, Nu na' ben yehua' yubá, en le nacué' ni', enca' yödzölió, en le nacué' ni', enca' nísado', en le nacué' ni', ate' gunné': "iBíti'rö tse! ⁷ Cate' ucödxè' gubáz lá'ayi igadxi lúzuba' böa' bëdxi, usudxinè' Dios le nagachi' queë', lë na' buluí'inè' yugu' huen dxin queë', bönni' ni' gulu'ë didza' uláz queë'."

⁸ Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxí' guíchido' nayalaj na' zönè' gubáz lá'ayi na' nulibè' lu nísado', en luyú bidxi."

⁹ Guyija' ga na' zoë' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxè' neda', gunné': "iGuzxí', gudagu! Lu ru'u gaca zxixi ca naca bidxína'do' queéba' buz, pero lë'u huóaca silá'."

¹⁰ Guzxí'a guíchido' na' zönè', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böaca silá' lë'a.

¹¹ Ní'irö gudxè' neda': "Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacué' yúgu'tè yödzö, en gapa tuí'i zían didza' yúbölö, en lógaca zían bönni' unná bë'."

Chopë' bönni' tunè' ba nalí

11 ¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacué' ni' ta'yéaj ládxi'gaca Dios.

² Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chop-a-un beo'."

³ Gudxè' ca' neda': "Isól-la'a chopë' bönni' ilunè' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácuagaquiè' lari' le naca bödzádzado'." ⁴ Chopë' bönni' ni tunè' ba nalí, nácuagaquiè' chop-a yaga olivo na' nazúaj lu guichi lá'ayi ca naca

quégaquië', en nácagaquië' ca' chopá le nuá'gaca guí' na' nacuá' lahuë' Dios, Xani yödzülió. ⁵ Channö gué'ëni nu guá' dö' quégaquië', irúaj guí' ruá'agaquië' le usuniti nu na' ré'ëni guá' dö' quégaquië', en guti nu na', enca' nupa ta'dá'baga' légaquië'. ⁶ Chopë' ni dë lu ná'agaquië' ulu'záguë'ë xinöza nisa guiöj lúxiba, para cabí galaj guiöj tsca dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huóaca nisa rön, en ilunë' ga gatsaj yödzöhué' yödzölió. Ilunë' caní bálati'tës luzuí ilé'ënnë'. ⁷ Cate' údxi ilunë' ba nalí, irúajba' böa' sínia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'. ⁸ Le gulaca cazë' ila'túlusö ca' la' nöza lu yödzö zxön, ga ni' gudé'ë ca' Xanru' lë'e yaga cruz, en ca rucúdzuru' didza', nazí'i le ca' Sodoma, enca' Egipto. ⁹ Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tuí'i zían didza' yúbölö, en bönachi yúgu'të luyú, ila'lé'eni le gulaca cazë', en biti' ilu' lataj nu ucache' légaquië' yeru ba. ¹⁰ Ulu'dzéjade'e nupa nacuá' yödzölió tu' gulátië', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacuá' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'. ¹² Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. ¹³ La' ní'isö gudódida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunni le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' guluí'i zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió
nadódigaca lu në'ë Xanru' Dios,
en lu në'ë Cristo.

Lë' inná bë'tica'së'.

¹⁶ Ní'irö idapa uru'ë bönni' gula na' ró'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios.

¹⁷ Ta'nné':

iXantu' Dios, napa cazu' yöl-la' huáca!

iGuzóa cazu', en zoa cazu', en ral-la' guída cazu'!

iXclenu', tu' chibugunu' dxin yöl-la' huáca zxön quiu',
en risí lo' rinná bè'u!

¹⁸ iGula'lé bönachi yugu' yödzö
pero chibidxín dza gunu' léguequi xíguia'!
iNaca dza uchi'a usöróu' nupa chinátigaca!
iUbi'u quégaquië' huen dxin quiu',
yugu' bönni' gulu'ë didza' uláz quiu',
nupa néquiguequi quez quiu', en gulún bal Lo',
nupa nácagaca cá'asö, en nupa nácagaca lo!
iChibidxín dza usunítu' nupa bulu'suniti yödzölió!

¹⁹ Ní'irö gyalaj yudo' queë' Dios rö'ö yehua' yubá, ate' bilá' lahui
guí'ina lá'ayi ga yu'u didza' rucá'ana tsahui' le nunë' Dios. Guyëpi yösa,
en gulú'u bö zidzaj, en gunné guziú' luyú. Gudödi budó' zxu', en guró'ö
guió'j bögui' yöla sunna.

Tunu nigula, en tuba' bëla zxön xitsiní'

12 ¹ Ní'irö bilá' lahui yehua' yubá tu le naca bë'da', bulu'i lonu
tu nigula nácunu le naca ca gubidza, en zoa zxañ ní'anu beo'.
Dxía ícjanu tu le néquini oro ga dxíagacaba' chinnu böljaj bení'. ² Nigula
ni chizóa soa bí'ido' queénu, en ribódxinu tu' rúdia' lé'ënu. Riguí'i
rizáca'nu ruzóanu bí'ido' queénu. ³ Ní'irö ia'tú le naca bë' bilá' lahui
yehua' yubá. Bulu'i loba' tuba' bëla zxön xitsiní'. Nácaba' xiná gui'is,
ate' dxíagaca gadxi ícjaba', en chi lúzuba', ate' dxía tu le néquini oro tu
tu ícjaba' na'. ⁴ Len xibanba' gú'uyöjba' tu cö' tsa tu tsonna cö' böljaj
lúzxiba, en gurú'unaba' légacaba' luyú. Guzuí'ba' bëla zxön xitsiní' na'
lonu nigula na' chizóa sóabi' bí'ido' queénu. Zóaba' sina' gáguba'-bi'
bí'ido' queénu na' ca gáljabi' na'. ⁵ Buzóanu-bi' tubi' bi' i bönni'do' ral-la'
inná bé'ebi' yúgu'të yödzö len tu xiyaga guíë. La' bucuítatë'ë-bi' Dios
bí'ido' queénu na', en buchisë'-bi' ga ni' zoa cazë' Lë', rö'ë lataj lo ga na'
rinná bë'ë. ⁶ Buzúnnajnu nigula na', zéajnu lu lataj cá'asö, ga ni'
chinupé'ë Dios lataj queénu. Ulu'gahuë'-nu ni' idú ca chinnu gayuá' yu'
tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë'
Miguel, en yugu' gubáz lá'ayi dá'gaquië' lë' gula'díl-lalenë'-ba' bëla
zxön xitsiní' na'. Gula'dil-la bëla zxön na', en yugu' gubáz xihui' dá'gaca
lëba' ⁸ pero biti' bila'deli' lu gudil-la na'. Que lë ni na' bíti'rö bidzöli
xilátjagaca yehua' yubá. ⁹ Caní guca, gula'rú'unë'-ba' bëla zxön xitsiní'
na' ní'ilö. Nácaba' bëla na' zóaba' dza ni'te, lëba' tu' xihui'. Gula'rú'unë'
tu' xihui' yödzölió, dzágagaca le gubáz xihui' na' dá'gaca le.

¹⁰ Ní'irö biyönda' tu chi'i ruí'i zidzaj didza' yehua' yubá, rnna: "Na'a
chibidxín dza nulu'ë lahui yöl-la' rusölá nunë' Dios, en yöl-la' huáca
queë', en le rinná bë'ë, enca' le rinná bë'ë Cristo, tu' chigula'rú'unë'
ní'ilö nu na' buzegui yugu' böchi' luzá'aru' didza'. Rëla, en të dza

buzegui légaquië' didza' lahuë' Dios queëru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalí queë'. Biti' guluí'i ládxi'gaquië' yöl-la' na'bán quégaquië', pero gulátië'. ¹² Que lë ni na' gaca yöl-la' rudzeja yehua' yubá. iBuli'dzeja libí'ili', zóali' ni'! iBica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

¹³ Cate' gúquibe'eba' bëla zxön xitsiní' na' chigula'ru'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu.

¹⁴ Ní'irö Dios bë'ë-nu nigula na' chopá xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj.

¹⁵ Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en güi'i nisa yegu na' gúbaba' bëla zxön xitsiní' na'. ¹⁷ Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazí' lu nē'eguequi le nunë' Jesucristo ba nalí.

Chópaba' böa' sínia'

13 ¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. ² Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budódiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. ³ Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'. ⁴ Gula'yéaj ládxi'gaquië'-ba' bëla zxön xitsiní' na', tu' budódiba' yöl-la' unná bë' queéba' lu ná'aba' böa' sínia' na'. Gula'yéaj ládxi'gaquië'-ba' böa' sínia' na', en gula'nné': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

⁵ Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopá-un beo' guta' lu ná'aba' yöl-la' unná bë'. ⁶ Gusí loba' rinnëba' queë' Dios, en rinné xíhui'ba' que Lë' Dios, en que lataj lá'ayi queë', en quégaca nupa nacuá' yehua' yubá.

⁷ Guta' lu ná'aba' gudíl-lalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bë'ëba' yúgu'të bönachi izá'a, bönachi yúgu'të yödzö, en bönachi tuí'i yúgu'të didza' yúbölö, en

bönachi idútë yödzölió. ⁸ Yúgu'të bönachi nacuá' yödzölió gula'yéaj ládxi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

⁹ Channö nu riyöni, ral-la' uzé nagui. ¹⁰ Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guíë tuchi', len guíë tuchi' ilátigaca. Que lë ni na', ral-la' ila'böza zxön ladxi' nupa néquiguequi queë' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxila', en ruí'iba' didza' ca na' ruí'iba' didza' bëla zxön xitsiní' na'. ¹² Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacuá' yödzölió böa' sínia' zí'alö na', böa' na' buniti huë' le guti lëba'. ¹³ Böa' buropi na' runba' ca' le nácagaca bë' ga ridxintë runba' ga ruhuóxaj guí' le za' lúzxiba, en ruhuóxaj luyú lógaca yúgu'të bönachi.

¹⁴ Rizí' yé'eba' bönachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bé'eba' bönachi nacuá' yödzölió ilunë' tu budó' ca nácaba' böa' sínia' na' gúcaba' huë' que guíë tuchi', ate' nabanba'. ¹⁵ Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en güi'i didza' budó' ni, en gun ga nu guti yúgu'të nupa biti' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. ¹⁷ Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. ¹⁸ Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

Le tul-lë' tu gayuá' yu' tapa-un milë' bönni'

14 ¹ Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'. ² Ní'irö biyönda' tu le rigú'u bö yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyón cate' ta'guínnië' lë'e tu le rul-la zë zían du que. ³ Tul-lë' tu le rul-la cubi, nacu'ë ca dódilö lahui lataj lo ni', enca' ca dódilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un

milë' bönni' ni, bönni' na' böá'uë' Cristo légaquië' ladaj bönachi yödzölió. ⁴ Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gátit'tës ga sa'yéajë'. Cristo caz böá'uë' légaquië' ládjagaca bönachi, ate' nácagaca nupa bulu'dödi cúngaquië' zí'alö queë' Dios, enca' queë' Bönni' na' náquië' Bö'cu' Zxíla'do'. ⁵ Catu caz gula'zí' yë'ë, ate' cuntu nu gaca bi inné quégaquië' ga na' nacu'ë ca dódilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

⁶ Ní'irö bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacuá' yödzölió, bönachi idútë luyú, yúgu'të bönachi izá'a, en bönachi tuí'i yúgu'të didza' izá'a, en bönachi yúgu'të yödzö. ⁷ Ru'ë zidzaj didza', rnnë': “iGulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! iGuli'tséaj ládxë'ë Dios, nunë' lúzxiba, en luyú, en nísado', en gapa ralaj nisa!”

⁸ Ia'tué' gubáz lá'ayi söjnéhuë' gubáz lá'ayi ni, en rnnë': “iChibudxi que yödzö Babilonia! iChibudxi que yödzö zxön na'! Caní guca que, tu' gulún nupa nacuá' ni' ga gula'zí' lu náagaquië' bönni' yúgu'të yödzö ilunë' ca nácagaca le ta'zé ládxí'gaquië' le ruá' dö'.”

⁹ Ia'tué' gubáz lá'ayi söjnéhuë' gubáz lá'ayi buropi ni , en ru'ë zidzaj didza', rnnë': “iChannö nu tseaj ladxi'-ba' böa' sínia' na', enca' budó' queéba', en güí'i lataj ta' ra' xigué o lu në'e le naca bë' da' lëba', ¹⁰ gunë' Dios nu ni xíguia' lu yöl-la' rilé queë'! iQui'i saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! ¹¹ Cuéntica'sö dzön que guí' ga ni' quí'i saca' nu na'. Rëla, en te dza qui'i saca', ate' catu caz gata' lataj ulu'zí' ládxí'gaca nupa ila'yéaj ládxí'gaca-ba' böa' sínia' na', en budó' queéba'. Biti' ulu'zí' ládxí'gaca nupa iluí'i lataj ta' laba' léguequi. ¹² Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxi'.”

¹³ Ní'irö biyönda' chi'i nu ruí'i didza' yehua' yubá, en rë neda': “Buzúaj lu guichi lë ni: iBica' bágaca nupa ilátigaca na'a si lo, nupa na' ta'yéajlë' Xanru'!”

Dios Bö' Lá'ayi rnnë': “iCa' gaca! iUlu'zí' ládxí'gaquië' lu dxin gulunë', en ulu'zi'ë xibé ca sa'yéaj le gulunë'!”

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë. ¹⁵ Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en

gudxë' Nu na' rō'ō lu böaj na', gunné': "iBugún dxin guíë tuchi' quiu', en guchugu xzoa' xtila, tu' chibidxín dza nu uzí' le! iChinabídx do que le dë yōdzōlió!"

¹⁶ Ní'irō Nu na' rō'ō lu böaj na' bugún dxin guíë tuchi' idútë yōdzōlió, ate' buzi'ë le rulá' luyú.

¹⁷ Ní'irō birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. ¹⁸ Birúajë' ia'túë' gubáz lá'ayi ra' bucugu ni', dë lu nē'ë inná bé'enë' guí', ate' bē'ë zidzaj didza', en bulidzë' gubáz lá'ayi zí'alō na' nu'ë guíë tuchi', gunné': "iBugún dxin guíë tuchi' quiu', en butubi tu'xóa huéaj le ta'bía lubá uva rō'gaca yōdzōlió, tu' chiná le ta'bía lubá uva!"

¹⁹ Ní'irō gubáz lá'ayi ni bugunë' dxin guíë tuchi' idútë yōdzōlió, en butubë' le ta'bía lubá uva rō'gaca luyú, ate' yōjchú'unë' le ta'bía lubá uva na' lu yeru zxōn ga izí xisi. Yugu' lë ni ruluí'i ca gunë' Dios, gunë' xíguia' bönachi nacua' yōdzōlió. ²⁰ Bulu'libë' le ta'bía lubá uva na' lu lerui zoa ní'ilō ra' yōdzō, ate' lu lerui na' birúaj rōn, en gurén ga bidxintë ruá'agacaba' böa', en gudōdi rōn na' idú tsca gaca sá'aru' idú chinu dza.

Yugu' gubáz lá'ayi nuá'gaquië' gadxi yōdzōhuë'

15 ¹ Bilé'eda' ia'tú le nácada' bē' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yōdzōhuë' röjsétegaca, le ugunë' dxin Dios, údxi gunë' xíguia' bönachi yōdzōlió.

² Bilé'eda' ca' tu le naca ca tu nísado' le rēpi yōsa bení' ca guiój jara le nutsí'i guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bē'ë Dios quégaquië'. ³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nné':

iLi', Xantu' Dios, zxöntëro nacu' Li'!

iZxöntëro naca yúgu'të le benu',

le tun ga rubánitu'!

iLi' rinná bé'enu' yugu' yōdzō!

iIdú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

iTuzu' Li' nacu' lá'ayi!

iIla'dxín bönachi yúgu'të yōdzō,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

⁵ Gudōdi guca lë ni, buyúa', en bilé'eda' gualaj yudo' yehua' yubá ga ni' dë lataj lá'ayi que le naca bē' zóalenë' Dios bönachi queë'.

⁶ Bila'ruájë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. ⁷ Ní'irö tu nu nutsa' ladaj idapa nupa na' nabángaca, bë' que queégaquië' gadxi gubáz lá'ayi na' gadxi zxíga'do' néquiguequini oro, en yúdzugaca le ruluí'i yöl-la' rilé queë' Dios, Bönni' zoa cazë'. ⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

Yugu' zxíga'do' yúdzugaca le ruluí'i yöl-la' rilé queë' Dios

16 ¹ Ní'irö biyönda' chi'i nu ruí'i zidzaj didza' lataj lá'ayi na', en rë gadxi gubáz lá'ayi na', rnna: “iGuli'tséaj! iGuli'tsöjlálaj gadxi zxíga'do' na' lu yödzölió, le yúdzugaca lë na' ruluí'i yöl-la' rilé queë' Dios!”

² Guyijë' gubáz lá'ayi zí'alö, en yöjlaljë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queéba'.

³ Ní'irö guyijë' gubáz lá'ayi buropi, en yöjlaljë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

⁴ Guyijë' gubáz lá'ayi bunni, en yöjlaljë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön. ⁵ Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': “iXantu' Dios Lá'ayi! iZoa cazu', en guzóa cazu'! iTsahui' nacu' tu' richugu' caní quégaca bönachi ⁶ tu' bulu'laljë' rön quégaca nupa néquiguequi quez quiu', en quégaca nupa guluí'i didza' uláz quiu'! iNa'a, Li' runu' ga ilé'ajë' rön, tu' caní ral-la' gaca quégaquië'!”

⁷ Ní'irö biyönda' ruí'i didza' tu nu zoa ra' bucugu yehua' yubá ni', rnna: “iCa' gaca, Xantu' Dios, napa cazu' yöl-la' unná bë'! iIdútë li, en tsahui' naca ca richugu' quégaca bönachi!”

⁸ Guyijë' gubáz lá'ayi budapi na', en yöjlaljë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí' que. ⁹ Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nné zi'i queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

¹⁰ Guyijë' gubáz lá'ayi guyu' na', en yöjlaljë' le yudzu zxíga'do' zönë' lu xilataj böa' sínia' ga na' rinná bé'ëba', ate' guró'ö chul-la gapa rinná bé'ëba'. Ní'irö, tu' gula'guí'i gula'zaca' bönachi, guláguya'a lúdxi'guequi, ¹¹ pero biti' bulu'bí'i ládxi'gaca para cabirö ilúngaca le ruá'

dö' tunë'. Gula'nné' zi'i queë' Dios zoë' yehua' yubá tu' ta'guí'i ta'zaca', en tu' dxíagaca yudzu' ya'a na'.

¹² Guyijë' gubáz lá'ayi buzxopi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para íbá'a nōza ga íla'dōdi nupa ta'nná bē', nupa íla'rúaj zaca' ga rilén gubidza.

¹³ Ní'irō bilé'eda' bëla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu'bani bönachi. Yōjaca bö' xihui' na' idú yōdzōlió, en yōjtúbigaca nupa ta'nná bē', para tsōjáquië' lu gudil-la na' gaca lu dza zxön queë' Dios, Bönni' napa cazë' yöl-la' unná bē'. ¹⁵ Caní rnnë' Dios:

“íBuli'yútsöca!! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bönachi.” ¹⁶ Yugu' bö' xihui' na' bulu'tubi yugu' bönni' ta'nná bē'ë, ate' bulu'dubë' tu lataj nazí'i le lu didza' hebreo: Armagedón.

¹⁷ Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rnna: “Chinaca.”

¹⁸ Ní'irō guyëpi yōsa, en guró'ōda' bö, en gunné guziú'. Gudódida' budó' xzu', le gudódida'rō ca gudōdi tsanni ni nacuá' bönachi yōdzōlió.

¹⁹ Birúaj tsonna có'ölö yōdzö zxön na', ate' gula'guínnaj yōdzö nacuá' yōdzōlió. Yōjnenë' Dios le naca xihui' gulún bönachi yōdzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'.

²⁰ Bila'gachi' yugu' luyú bidxi dzö'ö lu nísado', ate' bíti'rō gula'lá' yugu' guí'ado'. ²¹ Böxaj ca' guió'j bögui' yōla sunna, le za' lúzxiba, en yōjsóa ícjagaca bönachi, ate' nál-li' tu tu guió'j bögui' na' ca tu gayuá' guíë, ate' yúgu'të bönachi gula'nné xihui' queë' Dios tu' nōzi guió'j bögui' na' tu' bulu'sáca'da' zi'i léguequi.

Dios richúguië' queënu nigula udá dzaga

17 ¹ Ní'irō bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bé'lenë' neda' didza', gunné': “Gudá ni, ate' uluí'ida' li' ca gunë' Dios, gunë'-nu xíguia' nigula udá dzaga na', ró'önu lu nísado' zían.

² Gula'cua'len lënu nupa ta'nná bē' luyú yōdzōlió, en gulún le ruá' dö', ate' gula'zudxi nupa nacuá' yōdzōlió ni, tu' gulunlen lënu le biti' naca dxi'a.”

³ Dios Bö' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chi

lúzuba', en dá'gaca ca' lëba' le ta'nné xihui' queë' Dios. ⁴ Nigula na' dxíanu lëba' nácunu lari' xiná chul-la, en lari' xiná guí'ido'os. Nazí'i biquitaj queënu le néquiguequini oro, en yugu' guió'j nazaca', en yugu' bugá. Lu ná'anu rö'ö tu zxíga'do' néquini oro, en yudzu le nácagaca xihui', en le ruá' dö' runnu. ⁵ Ra' xigánu dá'gaca ca' lënu, le tu'luí'i tu le nagachi', en ta'nná caní: “Yödzö Babilonia Le Naca Lo”, en “Xiná'agacanu Nigula Udá Dzaga”, en “Xiná'agaca Le Xihui' Dzö'ö Yödzölió.” ⁶ Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'. ⁷ Gudxë' gubáz lá'ayi na' neda', gunné': “¿Bizx que rubánu?” Uzéajni'ida' li' lë na' nagachi', le ruluí'i ca' naca nigula ni, enca' le ruluí'i ca' naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'. ⁸ Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúajë' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

⁹ 'Lë ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi guí'ado' gapa rö'önu nigula na'. ¹⁰ Lësca' caní gadxi ícjaba' na' tu'luí'i gadxë' bönni' ta'nná bë'ë. Gáyü'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'túë' biti' ridxíninë', pero cate' guídë', inná bë'ë tu chí'ido'osö. ¹¹ Böa' sínia' na' guzóaba', pero biti' zóaba' na'a, ruluí'i tu bönni' izxunu', inná bë'ë. Nunë' tsözxón bönni' gadxi na', ate' tödi ni nítie' tsaz.

¹² 'Chi lúzuba' na' bilé'enu' tu'luí'i chië' bönni' ila'nná bë'ë. Biti' ta'zíninë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxón len böa' sínia' na'. ¹³ Chië' bönni' ni, lëbisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'. ¹⁴ Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'.”

¹⁵ Gubáz lá'ayi na' gudxë' ca' neda', gunné': “Yugu' nísado' na' bilé'enu' gapa ni' rö'önu nigula udá dzaga na', tu'luí'i bönachi yugu' yödzö, en yugu' bönachi izá'a, en bönachi tuí'i yugu' didza' yúbölö, en bönachi yugu' luyú. ¹⁶ Chi lúzuba' böa' sínia' na' bilé'enu', en tu'luí'i chië' bönni', biti' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahuë' xipéla'nu, en ulu'zégui'ë-nu len guí'. ¹⁷ Dios uchízië' icja ládxi'do'gaquië' chië' bönni' na' le gun ga ilunë' ca ré'ëni quézinë' Lë', ate' ilácagaquië' tuz, en ulu'dödë' yöl-la'

unná bē' quégaquiē' lu ná'aba' böa' sínia' na' para gaca ca rnna xtídzē'ē.
¹⁸ Nigula na' bilé'enu'-nu ruluí'i yödzö zxön na' rinná be'e nupa ta'nná
 bē' yödzölió ni."

Riguinnaj yödzö Babilonia

18 ¹ Gudödi na' bilé'eda'-nē' ia'túē' gubáz lá'ayi ruhuötjē' rirúajē'
 yehua' yubá, en dē lu nē'ē yöl-la' unná bē' zxön, ate' guyēpi
 yösa bení' luyú ni'a que yöl-la' bení' queē' gubáz lá'ayi na'. ² Bē'ē zidzaj
 didza' gubáz lá'ayi na', gunné':

iChibiguínnaj! iChibiguínnaj Babilonia, yödzö zxön na'!

iChiböáca xilataj tu' xihui', en xilátjagaca bö' xihui' tun ditaj
 bönachi!

iYugu' biguínni xitsiní', en yugu' biguínni xihui' tu'zóaba'
 xilátajgacaba' ni'!

³ Caní guca que yödzö na' ni'a que le gulún bönachi nacué' ni'.
 Gulunē' ga gulún bönachi yúgu'tē yödzö ca nácagaca le ta'zēsö ladxi'
 le ruá' dö'.

Nupa ta'nná bē' luyú yödzölió gulunlen légaquiē' le ruá' dö',
 ate' guta' yöl-la' tsahui' quégaquiē' bönni' to'o tuti' nacu'ē yödzölió
 tu' guyánda' yugu' le nazaca' gula'zé ladxi' bönachi ni'.

⁴ Ní'irö biyönda' ruí'i didza' ia'tú nu zoa yehua' yubá, rnna:
 Guli'rúaj lu yödzö na', libí'ili' néquili' quia'
 para cabí gunli' dul-la' tsözxón len légaquiē',
 en para cabí quí'i sáca'li' le gaca quégaquiē'.

⁵ Nayánda' dul-la' nabága'gaquiē',
 en chinayasa nadxín caz lúzxiba,
 pero Dios röjnenē' le ruá' dö' núngaquiē'.

⁶ Buli'bí'i quégaquiē' ca na' gulunē' queéli'.
 Buli'bí'i quégaquiē' chopá cō' tsca le gulunē'.
 Buli'bí'i quégaquiē' chopá cō' tsca le naca xihui' gulunē' queéli'.

⁷ Guli'gún ga ila'guí'i ila'záquiē', en ila'bödxí yéché'ē
 tsca guca yöl-la' ba, en yöl-la' zxön guluí'i cúngaquiē'.
 Ta'zá' ladxí'gaquiē', ta'nné':

Ró'ötu' ni, rinná bē'ētu'.

Biti' nácatu' uzēbi, en catu caz cödxí yéchi'tu'.

⁸ Que lē ni na', tu dzasö ila'dxín quégaquiē' le ila'guí'i ila'záquiē',
 yöl-la' guti, en yöl-la' ribödxí yechi', en yöl-la' ridún.
 Iléguiē' lu guí', tu' napa cazē' yöl-la' huáca zxön Xanru' Dios.
 Lē cazē' usiúdxē' quégaquiē'.

⁹ Ní'irö gunné': "Ila'bödxí nupa ta'nná bē' luyú yödzölió, en gulún le
 ruá' dö' tsözxón len légaquiē', en bulu'zí' xibé le nequi quégaquiē'.
 Ila'bödxē', en ila'bödxí yéché'ē cate' ila'lé'enē' dzön que yödzö zxön na'
 régui. ¹⁰ Zi'tu' zítu'sö ila'cu'ē tu' iládxinē' ca gaca xíguia' le gaca que

yödzö na', ate' ila'nné': iBica' bayechi' Babilonia, yödzö zxön ni, le gúcada' lo! iTu dzasö guca xíguia' que!”

¹¹ Ní'irö gunné': “Ila'bödxë' ca' bönni' to'o tuti' nacu'ë yödzölió, en ila'bödxí yéché'ë ni'a que yödzö na' tu' cabirö soa nu ga'u bi ilúti'ë ni'.”

¹² Cúnturö nu ga'u ni':

Le néquiguequini oro, en plata,
 en yugu' guió'j zaca', en yugu' bugá,
 en yugu' lari' nazáca'da', en lari' xiná chul-la,
 en lari' dxí'ado', en lari' xiná guí'ido'os,
 en yugu' yaga rilá' zxixi,
 en le néquiguequini dxita nazáca'da',
 en le néquiguequini yaga nazáca'da',
 en le néquiguequini guí'ë cobre,
 en le néquiguequini guí'ë,
 en le néquiguequini guió'j jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
 en le rilá' zxixi que mirra, en que yöj olíbano,
 en xisi uva nál-la, en le naca za,
 en yiózja dxí'ado', en xxa' xtila,
 en yugu' búrrodo', en yugu' bö'cu' zxila',
 en yugu' böa', en yugu' carreta,
 en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilé légaqui'ë, ila'nná:

Nadúagaca le guzé ládi'li'.
 Chigudödi quégaca yöl-la' tsahui',
 en le nácagaca lachi queé'li',
 ate' bíti'rö idzólili' légaqui.

¹⁵ Ní'irö gunné': “Ila'bödxë' bönni' to'o tuti' na', tu' guta' quégaqui'ë yöl-la' tsahui' tu' gulúti'ë lu yödzö na', ate' ila'cu'ë zi'tu' zítu'sö tu' iládxin'ë ca gaca xíguia' le gaca que yödzö na', en ila'bödxí yéché'ë.”

¹⁶ Ila'nné':

iBica' bayechi' yödzö ni guca zxön!
 Guca ca tu nigula nácunu lari' nazáca'da',
 en lari' xiná chul-la, en lari' xiná guí'ido'os,
 en nazí'i biquitaj queé'nu le néquiguequini oro
 en le néquiguequini guió'j zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': “Yúgu'të bönni' xan barco, en nupa nacué' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zítu'sö.” ¹⁸ Cate' ila'lé'ené' dzön que yödzö na' régui, ila'bödxë', en ila'nné': “¿Bízxilö yödzö guca zxön ca naca yödzö ni?”

¹⁹ Ní'irö gunné':

Ulu'dxíë' bëchtö ícjagaquië'.

Ila'bödxi', en ila'bödxi yeché'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'

quégaca yúgu'të nupa nácgaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali' yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzö ni

ni'a que bi gulún queéli' nupa nacuá' lu yödzö ni.

²¹ Ní'irö tuë' gubáz lá'ayi nál-la buchisë' tu guiój zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,

tu' iguinnaj yödzö na' guca lo,

ate' bíti'rö nu udzöli le.

²² Bíti'rö nu yöni lu yödzö na' nupa ta'guinni lë'e le rul-la,

en calëga nupa tu'cödxí gui

en calëga nupa tu'cödxí lúzuba' böa' bëdxi.

Bíti'rö udzöli bönni' huen dxin ni',

en bíti'rö yöni bö rigú'u le rutu ni'.

²³ Bíti'rö uzení' nitú guí' lu yödzö na',

en bití' yöni chí'ë bönni' rutsaga në'ë ni',

en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzö ni,

en guzxí' yé'eli' bönachi idútë yödzölió len yöl-la' gudzá' queéli'.

²⁴ Lu yödzö ni gulaj xichóngaqueië' bönni' gulu'ë didza' uláz queë'

Dios,

en xichóngaca nupa néquiquequi queë' Dios,

enca' xichóngaca yúgu'të bönachi yödzölió,

tu' bétigaca nupa nacuá' yödzö ni léguequi.

19 ¹ Gudödi lë ni biyönda' tuí'i zidzaj didza' bönachi zían nacuá' yehua' yubá, ta'nná:

¡Yöl-la' ba Dios! ¡Yöl-la' rusölá runë',

ate' yöl-la' zxön, en yöl-la' unná bë' napë' Dios queéru'!

² ¡Naca idútë li, en tsahui' ca rusiúdxë'!

¡Guchúguië' que yödzö na' naca ca tu nigula udá dzaga,

en quégaca bönachi lu yödzö na' ila'niti tsaz!

¡Gulún ditaj bönachi yödzölió tu' nözi le ruá' dö' gulunë'!

¡Dios buzí' lëbë' légaquië'

tu' gulútië' yugu' huen dxin queë'!

³ Leyúbölö gula'nné': "iYöl-la' ba Dios! iCuéntica'sö dzön ga régui yödzö na'!"

⁴ Idapa uru'ë bönni' gula ni' bulu'tsaga lógaquië' lu yu tsözxón len idapa nupa ni' nabángaca, en ta'yéaj ládxi'gaquië' Dios, Bönni' rō'ë lataj lo queë'. Gula'nné': "iCa' gaca! iYöl-la' ba Dios!"

⁵ Ní'irö biyönda' ruí'i didza' tu nu zoa lataj lo na', rnna:
iGuli'cu'ë Dios queéru' yöl-la' ba
yúgu'tëli' runli' xichinë', libí'ili' na' rádxili' Lë',
nácali' bönachi cá'asö, en bönachi lo!

Laní que yöl-la' rutsaga na' queë' Bönni' náquië' Bö'cu' Zxíla'do'

⁶ Biyönda' ca' nu ruí'i zidzaj didza', le biyón ca riyón cate' tuí'i didza' bönachi zían, en biyón ca' ca riyón ga ridödi tu yegu zxön, o ca riyón cate' rinné guziú', ate' rnna:

iYöl-la' ba Dios tu' risí lahuë' rinná bē'ë!

iNapa cazë' yöl-la' huáca!

⁷ iRal-la' udzeja ládxi'ru', en uzí'iru' xibë',

en cú'uru'-në' yöl-la' ba

tu' chibidxín dza laní que yöl-la' rutsaga na'

queë' Bönni' na' náquië' Bö'cu' Zxíla'do'!

iSi' lu në'ë Cristo nupa néquiquequi queë'!

iChinabá'a queébi' bi'i utsaga ná'alēbi' Lë'!

iNácabi' le ruluí'i nupa na' néquiquequi queë'!

⁸ iDios ru'ë-bi' lataj gácubi' lari' nazáca'da'

le naca idú, en rēpi yōsa bení'!

Lari' nazáca'da' na' ruluí'i le naca tsahui' núngaca nupa néquiquequi queë' Dios.

⁹ Ní'irö gubáz lá'ayi na' gudxë' neda', gunné': "Buzúaj lu guichi didza' ni: iBica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "iYugu' didza' idútë li ni ru'ë didza' Dios caz'!"

¹⁰ Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "iBiti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idútë li ca naca queë' Jesús. iGuyéaj ládxi'ë Dios!"

Nupa tuí'i didza' uláz queë' Dios, tuí'i didza' le naca idútë li ca naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' buluí'i loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí'i Didza' Le Nácatë. Caní lë' tu' ruchi'a rusöróë' ca naca le naca idútë li, enca' caní tsejë' gudil-la. ¹² Rēpi yōsa bení' guió'j lahuë', le nácagaca ca

guí', en dxíagaca icjë' zían le néquiguequini oro. Nazúaj lahuë' tu le lë', le cuntú nu nōzi, pero tuzë' Lë' nōzinë'. ¹³ Nācuë' tu lari' nē'aj rōn, en lë' ca' "Nu Naca Xtídzë' Dios." ¹⁴ Rōjnógaquië' Lë' ni'a nē'ë guizxi yu nacu'ë yehua' yubá, dxíagaquië'-ba' böa' chiguichi, en nácugaquië' lari' nazáca'da', le naca chiguíchido'os, en bití' naca bōsaj. ¹⁵ Rirúaj ru'ë le naca ca tu guíë tuchi' le gúninë' zì' bōnachi yugu' yōdzō. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bōnni' napa cazë' yöl-la' unná bë'. ¹⁶ Nazúaj lu lari' nācuë', enca' lu xigatsjë' ca lë', "Bōnni' Rinná Bé'enë' Nupa Ta'nná Bë'", enca' "Bōnni' Náquië' Xángaca Nupa Nácagaca Xan."

¹⁷ Ní'irō bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "iGulí'dá, bulí'dubi ga ni gáguli' laní zxōn queë' Dios! ¹⁸ Gáguli' xipéla'gaca nupa ta'nná bë', en xipéla'gaca nupa ta'nná be'e bōnni' rōjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bōnachi, nupa bití' nadó'ogaca, en nupa nadó'ogaca, nupa nácagaca cá'asō, en nupa nácagaca lo."

¹⁹ Ní'irō bilé'eda'-ba' böa' sínia' na', enca' yugu' bōnni' ta'nná bë'ë yōdzōlió, en bōnni' rōjáquië' gudil-la guizxi yu quégaquië', nudúbigaquië' para ilúnlenë' gudil-la Bōnni' dxíë'-ba' böa' chiguichi, dzágagaca Lë' ni'a nē'ë guizxi yu. ²⁰ Bidzunba' böa' sínia' na', enca' bōnni' na' bë'ë didza' uláz queéba', bōnni' na' benë' yugu' le nácada' bë' loba', en guzxí' yé'enë' nupa ni' guluí'i lataj nu uzúaj láhuiguequi lë na' naca bë' dá'gaca lëba', en gula'yéaj lādxi'gaca budó' queéba'. Böa' sínia' na', enca' bōnni' na' bë'ë didza' uláz queéba', gula'rú'unë' léguequi nabángacasō ca' ga rō'ō guí' zxōn le réguilen lë na' ruzégui'da'. ²¹ Bōnni' na' dxíë'-ba' böa' chiguích bétíë' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipéla'guequi.

Chi gayuá' iz

20 ¹ Gudōdi lë ni bilé'eda' ruhuōtjë' tu gubáz lá'ayi, zë'ë yehua' yubá, en zōnë' xzí'ini guíë que lataj chul-la, ate' nu'ë tu du guíë yōdx. ² Guzxōnë'-ba' bëla zxōn xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chi gayuá' iz. ³ Yōjchú'unë'-ba' lataj chul-la, en busayjë' lataj na', ate' budé'ë tu le riguela' le rusayaj lataj na' para cabirō si' yé'eba' bōnachi yugu' yōdzō ga izá'arō chi gayuá' iz na', ate' tōdi ni' ral-la' yédxiba' tu chí'ido'.

⁴ Ní'irō bilé'eda' yugu' lataj gapa ta'bō' nupa ta'nná bë', ate' nupa bila'deli' ulu'chi'a ulu'söró le raca ta'bō' yugu' lataj na'. Bilé'eda' ca' yugu' bö' gulaca caz bōnachi bulu'rixë' yénguequi yugu' bōnni' bití'

nácagaquië' tsahui' tu' gulún ba nalí queë' Jesús, en tu' gulún libán que xtídz'ë Dios. Yugu' bönachi ni biti' gula'yéaj ládxi'gaca böa' sínia' na', en budó' queéba', en biti' guluí'i lataj nu uzúaj ra' xigáquequi, o lu né'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, ⁵ pero ia'zica'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ iBica' ba, en bica' lá'ayi nupa ta'deli' yöl-la' rubán na' raca zí'alö! iYöl-la' guti le raca burópilö biti' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

⁷ Cate' izá'a chi gayuá' iz na', ulu'sanë' Satanás ga na' nadzún. ⁸ Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. ⁹ Guizxi yusö gula'dödë' idútë luyú, ate' gula'cu'ë lé'ajlö lataj ga na' nacuá' bönachi néquiguequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'. ¹⁰ Tu' xihui' na' nazí' ye'e légaquië', yöjchú'unagaquië' le ga rö'ö guí' zxön que lë na' ruzégui'da', ga na' chizóaba' böa' sínia' na', enca' bönni' na' bë'ë didza' uláz queéba'. Ila'guí'i ila'zaca' ni' rëla, en te dza yúgu'të iz zá'gaca.

Ta'dxín bönachi lahuë' Dios ga rö'ë ruchi'a rusöröë'

¹¹ Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. ¹⁴ Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. ¹⁵ Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

Tu lúzxiba cubi, en tu luyú cubi

21 ¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'. ² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'alénbi' tu bönni'.

³ Biyönda' ruí'i didza' nu rnna yehua' yubá: “iBuli'yútsöca'! iGa zoë' Dios zóalen bönachi! iSóalenë' léguequi, ate' léguequi ilácagaca bönachi queë'! iDios caz sóalenë' léguequi, en gáquië' Dios quéguequi! ⁴ Dios uzxië' nisa ribödxí zoa guió'j lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö.”

⁵ Ní'irö Nu na' rö'ö lataj lo ni' gunná: “iBuyútsöca'! iYúgu'të ruúna' cubi!”

Gudxi ca' neda': “iBuzúaj lu guichi lë ni, tu' naca idútë li didza' ni, en naca löza!”

⁶ Ní'irö gudxi neda': “iChinaca caz! iNeda' naca' Nu zoa zí'atëlö, enca' Nu røjsete ca naca le risí lo, en le ruúdxitë! iNu ribidxi nisa, neda' guna' ga guí'aj nisa na' runna yöl-la' na'bán! ⁷ Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxí'ini caza', ⁸ pero nupa tadxi, en nupa biti' ta'yéajlë' neda', en nupa nácagaca xihui', en nupa tuti bönachi, en nupa tun le biti' naca tsahui', en nupa nácagaca udzá', en nupa ta'yéaj ládxi'gaca budó' guió'j budó' yaga, en yúgu'të nupa ta'zí' yë', chizóa riböza xilátjaguequi lu guí', ga ni' rö'ö guí' zxön que lë na' ruzégui'da', lë na' naca yöl-la' guti le raca burópilö.”

Yödzö Jerusalén le naca cubi

⁹ Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxíga'do' yúdxugaca gadxi yödzöhuë' yöjsétegaca, bidë' ga zoa'. Gudxë' neda': “iGudá ni! iUluí'ida' li' bi'i nigula na' si' utsaga ná'alénbi' Bönni' na' náquië' Bö'cu' Zxíla'do'!”

¹⁰ Guzóalenë' Dios Bö' Lá'ayi neda', ate' guché'ë gubáz lá'ayi na' neda' tu lu guí'a sibi, en buluí'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. ¹¹ Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guió'j nazáca'da' ca naca guió'j guí'do'os nazí'i le jaspe. Naca yödzö na' yení'ido' ca naca guió'j jara. ¹² Zoa tu zö'ö zxön, en sibi idú gásibi'ilö yödzö na'. Lë'e zö'ö na' nacué' chinnu gapa nu riyaza. Ra' gapa nu riyaza na' nacué' chinnuë' gubáz lá'ayi tapa chilë. Tu tu ga nu riyaza na' nazúaj tu tu lágaca idxinnu cö' di'a dza zxí'ini xi'sóë' Israel. ¹³ Lë'e zö'ö le ruyú saca' ga rilén gubidza nacué' tsonna gapa nu riyaza, en saca' ga za' bö' ziaga nacué' tsonna gapa nu riyaza, en saca' tsölá'a ga ridödi gubidza beo' ziaga nacué' tsonna gapa nu riyaza, en saca' ga ribía gubidza nacué' ca' tsonna gapa nu riyaza. ¹⁴ Zxan zö'ö que yödzö na' nacué' chinnu xilibi zö'ö, ate' lé'egaca xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenē' neda' didza' zönē' tu yaga urixi le néquini oro para urixē' tsca naca yōdzō na', en tsca nácagaca gapa nu riyaza, en tsca naca zō'ō que. ¹⁶ Yōdzō na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixē' tsca naca yōdzō na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷ Burixē' ca' yöl-la' yōdx que zō'ō na', naca tu gayuá' yu' tapa-un dxita, tsca naca dxita que na' bönachi, lē na' ruríxinē' gubáz lá'ayi na'.

¹⁸ Zō'ō na' néquini guió'j jaspe, ate' yōdzō na' néquini órotēz, le naca yení'ido' ca naca guió'j jara. ¹⁹ Yugu' xilibi zō'ō que yōdzō na' nazí'gaca biquitaj guió'j nazáca'da'gaca.

Xilibi zō'ō zí'alō néquini guió'j jaspe.

Le buropi néquini guió'j zafiro.

Le bunni néquini guió'j ágata.

Le budapi néquini guió'j esmeralda.

²⁰ Le guyu' néquini guió'j ónice.

Le buzzopi néquini guió'j cornalina.

Le igadxi néquini guió'j crisólito.

Le izxunu' néquini guió'j berilo.

Le igá néquini guió'j topacio.

Le idxí néquini guió'j crisoprasa.

Le idxinéaj néquini guió'j jacinto.

Le idxinnu néquini guió'j amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nōza lo que yōdzō na' néquini órotēz, le naca yení'ido' ca naca guió'j jara.

²² Biti' bilé'eda' tu yudo' lu yōdzō na', tu' náquiē' Xanru' Dios yudo' que, napa cazē' idútē yöl-la' unná bē', en lēasca' caní náquiē' Bönni' náquiē' Bö'cu' Zxíla'do', náquiē' yudo' que yōdzō na'. ²³ Biti' run bayudxi tsení'gaca gubidza, en beo' lu yōdzō na', tu' uzení' yöl-la' bení' queē' Dios lu yōdzō na', ate' lēasca' Bönni' náquiē' Bö'cu' Zxíla'do' náquiē' le uzení' ni'. ²⁴ Bönachi yugu' yōdzō, nupa nulágaca, ila'dá lu bení' que yōdzō na', ate' yugu' bönni' ta'nná bē'ē yōdzölió idiguá'agaquiē' yöl-la' tsahui' quégaquiē' lu yōdzō na'. ²⁵ Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla. ²⁶ Bönachi yugu' yōdzō idiguá'agaquiē' ni' le nácagaca lesaca', en yöl-la' tsahui' quéguequi. ²⁷ Tu le ruá' dö' biti' ca' tsaza ni', en calēga tu le naca xihui', en calēga nu rizí' yē', pero tsázagacasö ni' nupa nazúajgaca láguequi lu guichi queē' Bönni' náquiē' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22 ¹ Ní'irö gubáz lá'ayi na' bulu'ínē' neda' tu yegu yení'ido', le naca nisa yegu le runna yöl-la' na'bán. Rēpi yōsa bení' yegu na' ca rēpi yōsa bení' guió'j jara. Rirúaj yegu na' lu lataj lo ga röl'ē Dios,

en ga rō'ë ca' Bōnni' náquië' Bō'cu' Zxíla'do'. ² Rizá' yegu ni gatsaj láhui'lō nōza lo que yōdzō na'. Tsōlá'a huéaj ra' yegu na' rō'ō tu yaga le runna yōl-la' na'bán, ate' ta'bía chinu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō. ³ Biti' soa ni' nitú le dxía dö'. Soa lu yōdzō na' lataj lo ga rō'ë Dios, enca' ga rō'ë Bōnni' náquië' Bō'cu' Zxíla'do', ate' yugu' huen dxin queë' ila'yéaj lādxi'gaquië' Lë'. ⁴ Ila'lé'enë' lahuë' Lë', ate' le nazí'i Lë' nazúaj ra' xigágaquië'. ⁵ Biti' gaca rēla ni', ate' nupa nacué' ni' bití' ila'quínna tu le cu'u bení', en calēga bení' que gubidza, tu' gáquië' Xanru' Dios bení' quēgaquië'. Nupa nacué' ni' ila'nná bé'tica'sö.

Chizóa huödë' Cristo

⁶ Ní'irō gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bō' Lá'ayi icja lādxi'do'gaquië' yugu' bōnni' tu'ë didza' uláz queë', chigusól-lë'ë gubáz lá'ayi queë' para uluí'inë' yugu' huen dxin queë' le ral-la' gácatë. ⁷ Caní rnnë' Jesucristo: iChizóa huöda'! iBica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyōnda', en bilé'eda' yugu' lë ni. Gudödi biyōnda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön. ⁹ Ní'irō lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. iBen zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. ¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." ¹² Rnnë' Jesús: "iChizóa huöda'! Nu'a lu na'a le nadéli'gaca bōnachi, ate' ubi'a que queé'guequi tsca naca le gulúngaca. ¹³ Neda' naca' Nu zoa zí'atëlō, enca' Nu rōjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irō gunné': "iBica' ba nupa nayari le nácugaca, en tun le naca dxi'a! iNazí'guequi lataj ilahuë' le ribía yaga le runna yōl-la' na'bán, en gaca ila'yaza gapa nu riyaza lu yōdzō na'! ¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bōnachi, en nupa ta'yéaj lādxi'gaca budó' guió'j budó' yaga, en nupa ta'yaza lādxi'gaca ta'zí' yë' ila'cuá' ní'ilō ra' yōdzō na'. ¹⁶ Neda', Jesús, gusól-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cō' bōnachi quia'. Neda' naca' di'a dza queë' David, enca' zxí'ini xi'sóë'. Naca' ca' bölj hui sila."

¹⁷ Tu'ë didza' Dios Bō' Lá'ayi, enca' bi'i nigula utsaga ná'alēnbi'-në' Bōnni' náquië' Bō'cu' Zxíla'do', ta'nnë': "iGudá!"

Nu riyöni didza' ni ral-la' inná: “iGudá!”

iNu ribidxi nisa, en nu rizé ladxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni.

¹⁹ Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi lë ni rnnë': “iÖn! iHuödatea!”

iCa' gaca! iGudá, Xantu' Jesús!

²¹ Rinábida'-në' Xanru' Jesucristo uzá' ládxë'ë queéli' yúgu'tëli'. iCa' gaca!